

PKS perlu segera beralih, optimumkan penggunaan teknologi moden, pendigitalan



29/10/2021 04:37 PM

KUALA LUMPUR, 29 Okt -- Perusahaan mikro dan kecil perlu segera beralih dan mengoptimumkan penggunaan teknologi moden dan platform pendigitalan perniagaan untuk kekal relevan, menurut Kementerian Kewangan dalam Laporan Tinjauan Ekonomi 2022 yang dikeluarkan hari ini.

Katanya kerajaan akan menggalakkan peralihan ini melalui promosi agenda pendigitalan negara terutamanya dalam kalangan isi rumah B40 dan M40 dengan menyediakan platform keusahawanan atau bekerja sendiri sebagai sumber pendapatan alternatif.

"Tindakan segera termasuk mempunyai proses perniagaan dari awal hingga akhir yang berasaskan sistem digital dan automatik merangkumi pengurusan perolehan dan inventori, perakaunan, pemasaran digital, e-Dagang dan sistem pembayaran digital," katanya.

Kerajaan telah menyediakan Rangka Tindakan Ekonomi Digital Malaysia dan Pelan Jalinan Digital Negara (JENDELA) sebagai dasar yang inklusif bagi mendorong pendigitalan firma bagi semua saiz dan wilayah serta menghapuskan halangan pendigitalan.

Bagi menyokong kestabilan kewangan jangka panjang dan penjana pendapatan dalam kalangan individu, penilaian segera keperluan peningkatan kemahiran dan latihan semula guna tenaga akan membantu rakyat untuk kembali bekerja dengan selamat dan mengehendkan kesan pengangguran yang berpanjangan serta ketidakpadanan kemahiran.

Menurut laporan itu, kajian yang dijalankan oleh kerajaan pada 2020 dan 2021 mendedahkan keperluan untuk guna tenaga dan perusahaan memperkukuh langkah peningkatan kemahiran dan latihan semula dalam mendepani norma baharu.

Selari dengan strategi yang digariskan dalam Rancangan Malaysia Ke12 (RMKe-12), usaha akan dipertingkatkan bagi memanfaatkan dan menggunakan teknologi dan pendigitalan dalam proses kerja.

“Selain itu, peningkatan kemahiran dan latihan semula bakat juga penting bagi memenuhi keperluan industri serta menyediakan akses kepada pembelajaran sepanjang hayat untuk semua segmen,” menurut laporan itu.

Kerajaan akan terus menyediakan bantuan bersasar bagi yang bekerja sendiri melalui pelaksanaan inisiatif peningkatan kemahiran dan latihan semula selari dengan keutamaan nasional seperti ekonomi digital, pendidikan dan latihan teknikal dan vokasional (TVET) dan revolusi perindustrian keempat.

Sementara itu, kerajaan terus memantau dan mengkaji pelaksanaan tindakan jangka pendek, sederhana dan panjang melalui platform peringkat tertinggi bagi memastikan pembaharuan dan pemulihan ekonomi diselaraskan dengan baik.

Menurut laporan itu, dalam jangka panjang, pendekatan yang diperbaharui akan menyokong belanjawan tahunan, RMKe-12 dan Wawasan Kemakmuran Bersama 2030 melalui pemantauan berterusan ke atas inisiatif pemulihan dan pembaharuan.

Kerajaan juga akan memperkukuh saluran komunikasi pada setiap peringkat untuk memastikan maklumat mengenai bantuan dan program disebarluaskan dengan berkesan, kata laporan berkenaan.

-- BERNAMA